



Le Faaletonu i le Supoketi a Sione

Tala na saunia e John Carr
Ata na tusia e Michael Wilkin



Le Faaletonu i le Supoketi a Sione



E lua lava mea sa fiafia tele i ai Sione, ma o le
tasi o na mea, o Supoketi – e lē o le supoketi
lea e 'ai, ae o Supoketi le rapiti o loo i totonu o
le pa i tua o le fale o Sione.




Sa igoa muamua Supoketi ia Taufulufulua, ae na iai le aso na sola ese ai mai lona pa ina ua pāpā faititili. O le fe'emo o uila ma pāpā faititili na fefe ai o ia. E maua atu o ia e Sione o loo lafi i lalo o se pupuvao i le paka e sosoo ma lo latou fale, ua lē toe fulufulua o ia. Ua susū uma ona fulufulu ma lavelave solo.

“O ona foliga ua pei o se ipu supoketi!” o le tala lea a Aunty Masina.

O inā lava na amata mai ai ona faaigoa Taufulufulua ia Supoketi.



Sa tausī lelei e Sione Supoketi. Na ia faamautinoa o iai se vai fou ma mamā i lana faguvai, ni vao fou, ni laulaau lanu meamata mai le togalaau ma ni ana mea'ai aogā e 'ai ma ni vaovao mamago e faamoe ai luga.




Sa ave ese foi e Sione, Supoketi mai lona
pa ina ia latou taaalo faatasi ai ma lona kaseni
o Lelei.



O le isi mea e fiafia tele ai Sione o le lakapi.
E fiafia e pasipasi ma sapo le polo, pu'e isi, kiki
le polo i le pou, sikoa se 'ai, oso i luga i laina e
fai pe a alu i fafo le polo, sulu le ulu i sikalamu,
matuā una'i lona tino malosi i molo ma fai
faatasi le "faamalo" pe a uma se taaloga.

I taeao o Aso Toonai, e taalo lakapi iuni ai
Sione mo le 'au a le Raging Rhinos. O Aso Sa,
e taalo lakapi liki ai mo le Leston Leopards pe
afai e iai se avanoa.



I se tasi aoauli, a'o lei amataina toleniga o lakapi, sa taaalo ai foi Sione ma Supoketi e pei ona masani ai, ae na iloa ai e Sione e pei lava e lē o fiafia Supoketi.

Ae i lena lava taimi na o ane ai Aunty Masina ma Lelei.

"O loo faanoanoa Supoketi," o le tala lea a Sione. "E lē o tutū lelei i luga ona taliga, ma ua lē matuā osooso foi e pei ona masani ai."

"Ai o manaomia sana uō," o le tala lea a Aunty Masina, auā e matuā malamalama lelei o ia i rapiti ma isi lava mau mea.

"Ae o a'u o lana uō," o le tala lea a Sione.

"O le uiga o la'u tala o sana uō rapiti," o le tala lea a Aunty Masina. "E fiafia rapiti e iai ni a latou uō latou te faifaimea faatasi, e pei lava foi o oe ma a'u. Se'i i le tulaga na semanū e iai le lakapi pe ana faapea e leai ni au uō tou te taaalo faatasi?"



Sa mafaufau i ai Sione. Na sa'o lava Aunty Masina. E leai lava se isi mea na ia manatu e sili atu ona lē manaia nai lo se sikalamu ae na'o le toatasi se tagata o iai.

“Ua tatau loa la ona tatou o e aumai se rapiti e fai ma uō a Supoketi!” o le tala lea a Sione.

“E lē faigofie,” o le tala lea a Aunty Masina. “E manaomia e rapiti ona faaalu se taimi e faamasani lelei ai le tasi i le isi. I le amataga, e tatau ona tuu lava na'o latou i totonu o latou fale. E umi sina taimi faato' a amata ona latou faauō ma nonofo faatasi.”




O le mauaina mai o se isi fale mo rapiti sa avea ma faafitauli tele mo Sione. Ae ua laki ona sa iai le aikia a Aunty Masina.

"E iai la'u falemoa ua tuai, ae tataua lava ona fetau i ai," o lana tala lea, "ae fai si telē ailoga e ofi i totonu o le veni ma e mamafa foi mo ta'ua pe a tosoa i lou fale."

Sa mafaufau Sione mo sina minute.

"Lea ua iai!" o lana tala lea a'o ia tuu atu Supoketi ia Aunty Masina. "Meaola feai!"

"O ā ituaiga o meaola feai?" o le alaga mai lea a Aunty Masina a'o tamo' e ese atu Sione. E na te le'i lagona atu le tali mai a Sione. Sa tai pei e faapea mai "Raging Rhinos".




Ina ua uma ona toe tuu Supoketi i lona fale, sa tilotilo atu Aunty Masina i le isi itu o le paka. O loo aga'i mai ia te ia lana falemoa tuai sa iai. Pe a vaai mamao atu i ai, sa pei o se meaola mata'utia e valu ona ulu ma vae e sefuluono ma ua matuā pa'ō mai lava.

O loo savali mai i tua o le meaola mata'utia se tamaloa ma sana fa'ili. O loo tualaga mai, "Tulei! Tulei!"


"Faafetai lava, coach," o le tala lea a Sione ina ua tū le falemoa ua lē minoi.


"Aua e te faafetai mai ia te au," o lana tala lea. "O le tatou sikalamu faata'ita'i sili lena ona lelei i lenei tausaga atoa!"



O le aso na sosoo ai, na o atu ai Aunty Masina, Lelei ma Sione i le SPCA e saili mai se uō rapiti mo Supoketi. Sa faaali ane e le tagata o loo vaaia manu ia Sione se rapiti e lanu enaena pa'epa'e. Na tuu iinā e se aiga ua o i se isi atunuu. E iai se ma'osi i le isi ona taliga mai se la tauga ma se pusi.

SPCA





Na manao ai lava iai Sione i le
taimi lena. "O le a ou faaigoaina o
ia ia Fasipovi," o lana tala lea.

"Fasipovi?" o le tala lea a
Aunty Masina.

"Ioe, Fasipovi," o le 'ata lea a
Sione, "auā o Supoketi ma Fasipovi
e auaiga."

Fautuaga e Maua ai se Rapiti Fiafia

- O rapiti o ni fagafao e ese le mananaia. E tele avanoa mo latou i le togavao. Ia mautinoa o iai se vaega i totonu o le latou pa mo le faiga o latou faamalositino ma ia telē lelei ina ia tamomo'e solo ai i totonu au rapiti ma ia lava le maualuga pe a tū tetee ai i o latou vae pito i tua.
- E fiafia rapiti e 'eli pu a lalafi ai i totonu. Tuu i totonu o latou pa ni atigipusa poo ni mea e fepuna ai i luga ma femaulu ai i lalo, ina ia mafai ai e lau rapiti ona lafi, suesue mea solo ma ona lagona ai le malupuipua.
- Taaalo ma lau rapiti i aso taitasi ma aveese mai fafo o latou pa ina ia faamalosi ai o latou tino.
- E fiafia rapiti i meataalo. Tuu a latou meaai i totonu o ni meataalo, e pei o pepa malō ia e ta'ai'ai ai le pepa toilet. Fai ma fesuisuiai ana meataalo ina ia aua ne'i fiu ai le rapiti.
- I le togavao, e fepe'ei rapiti i ni mea maualuluga e mata'i ai ni mea e lamatia ai o latou ola. Faatulaga se mea i totonu o le latou fale ina ia mafai e au rapiti ona fepe'ei i luga e siaki mo ni lamatiaga.
- O rapiti o ni manu e fiafia e ola faatasi ma isi. E sili atu ona fiafia pe a faifai mea faatasi ma tagata poo se isi rapiti.

Asiasi i le kids.spcaceducation.org.nz e te iloa atili ai isi mea e uiga i le tausiga o rapiti

The Problem with Sione's Spaghetti

© 2016 Society for the Prevention of Cruelty to Animals Education, Auckland, New Zealand

Published by Wendy Pye Publishing Limited for SPCA Education

Text by John Carr

Illustrations by Mike Wilkin

This Samoan edition published 2019

ISBN: 978-1-98-857828-6

All rights reserved. No part of this publication may be reproduced or transmitted in any form or by any means, electronic or mechanical, including photocopy, recording or any information storage and retrieval system, without permission in writing from the publishers.

Distributed in New Zealand by The SPCA

3047 Great North Road, New Lynn, Auckland 0640, New Zealand